



ज्वजलपा वा:पौ

JWOJALAPA NEPALBHASA WEEKLY

दै: ६ ल्या: १४ पूर्णाङ्क: ६६

ने. सं. ११३५ कौलाश्व पंचमि आइतवा:

२०७२ कार्तिक १ गते आइतवार (Oct- 18, 2015)

मू: ५/- (न्यातका)

नाकाबन्दीया कारण भारत खः ला कि मधेस आन्दोलन ? वर्तमान ओली सरकार हे अन्यौल

ज्वजलपा वा:पौ/

सरकारया नेतृत्व याये न्हयः तक नेपाः व भारतया सीमा लागाय नाकाबन्दी धइगु भारतं अधोषित रुपं यानाच्वंगु धकाः चर्को भाषण बिया राष्ट्रवादी जुइत स्वयादीम्ह न्हूम्ह प्रधानमन्त्री नापं एमालेया अध्यक्ष केपि शर्मा ओलीया लिपांगु इलय् वया भाय् हिला वंगु दु ।

मधेसवादी दलतयसं यानाच्वंगु आन्दोलन धइगु छुं हे मखु अले इमिगु माग धइगु माग हे मखु धकाः तर्क प्रधानमन्त्री जुइ न्हयः तर्क तयेगु नाप नापं लखौं मधेसी नापं तराईया जनतातयसं ल्हाःमाःहना प्रदर्शन याःगुयात तर्क ध्याचू नका नापं छगू कथं हेपेयाना हे 'मानव सांग्लो मखु माखे सांग्लो' धकाः सार्वजनिक रुपं हे न्ववानादीम्ह प्रधानमन्त्री केपि ओलिं लिपांगु इलय् वया मधेसवादी दलतलिसे

हे वार्ता यायेगु नितिं औपचारिक रुपं पौ च्वयादीगु दु । न्हापा जनजातितयगु आन्दोलन धइगु नं माकः फुँइ याःगु थें धकाः ध्याचू नकाः हेपेयानादीम्ह आःया प्रधानमन्त्री केपि ओली खना नेपाःया आदिवासी जनजातित नं छगू कथं तंचायाच्वंगु अवस्था दु ।

थज्वःगु हे इलय् लाका थः जिम्मेवार पदय् थ्यनेवं ओलीं आन्दोलनया कारणं पेट्रोलियम पदार्थ आपूर्तिइ सहज मजुया समस्या जुयाच्वंगु अले जनताया जनजीवनय् तर्क लिच्वः लाकाच्वंगुलिं आन्दोलनयात दिका वार्ताय् वयेत आह्वान याना लिखित रुपं पौ च्वयादीगु खः ।

उकिया अर्थ भारतं अधोषित नाकाबन्दी यानातःगुलिं नेपाः व भार तया दथुइ च्वंगु नाकापाखें पेट्रोलियम पदार्थ मवयाच्वंगु धकाः सार्वजनिक रुपं हे न्ववानादीम्ह वयकलं आः धाःसा



मधेसवादीतयगु आन्दोलनया कारणं समस्या जुयाच्वंगु खः धकाः स्वीकार यानादीगु खः ।

अथे सरकारं वार्ताया नितिं आह्वान याःसां मोहन नखः न्हयः धाःसा सरकार व आन्दोलनरत पक्षया दथुइ वार्ता धाःसा जुइगु अवस्था खने मदु । आन्दोलन याना वयाच्वंगु मधेसवादी दलया नेतातयसं आन्दोलनयात दिका वार्ताय् वयेगु मखु आन्दोलन नं जारी जुइ अले वार्ता नं जुइ धकाः ध्याच्वंगु दु । उकिं मोहन नखः तक नं स्विनिगःया जनजीवन सहज जुइगु अवस्था खने मदु धकाः धायेछिं ।



जनजातितपाखें नं आन्दोलनया तयारी

नेपाःया आदिवासी जनजातितयसं नं थःपिलिसे न्हापा राज्य पक्षं याःगु सहमतियात कार्यान्वयन यायेमाःगु, राज्यया हरेक निकाय दुने जनसंख्याया आधार य् समानुपातिक समावेशी प्रणाली लागू यायेमाःगु, पहिचानया माग पुरा यायेमाःगु नापं भाषा, जाती, संस्कृतिया ख्यलय् समानताया माग याना आन्दोलनया नितिं आदिवासी जनजाति राष्ट्रिय आन्दोलन नेपालपाखें गृहकार्य यानाच्वंगु दु । थ्व हे भ्वल्य ल्हाःचिं अभियान न्ह्याकूगु दुसा मधेसवादी आन्दोलनयात निरन्तर रुपं समर्थन याना वनेगु अले नापं आन्दोलन यायेगु तर्क तयारी यानाच्वंगु दु ।

विजया दशमीको शुभकामना

विजया दशमी एवं मोहनी नखः -२०७२ को शुभ अवसरमा समस्त नेपालीहरुमा सुख, शान्ति र समृद्धिको मंगलमय हार्दिक शुभकामना



Shree Ram Maharjan
Managing Director

ANK अनक कन्स्ट्रक्सन कं.प्रा.लि

ANK CONSTRUCTION CO.PVT. LTD

A Leading Class 'A' Company

G.P.O. Box 5813, Rabibhawan, Kathmandu, Nepal
Tel: +977-1-4278130, 4280799, Fax: 977-1-4280799
E-mail : ank@mhp.wlink.com.np, ank.nepal@gmail.com

Web: www.ank.com.np / www.ankcon.org.

नेपालीहरुको महान पर्व विजया दशमी २०७२ को मंगलमय हार्दिक शुभकामना



दर्शन बचत तथा ऋण सहकारी संस्था लि.

कीर्तिपुर-१७, काठमाडौं ।

फोन नं. : ०१४३३४२३५, ०१४३३२०५७

Email: info@darshansave.com

Website: darsahansave.com



ज्ञाजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

सम्पादकिय



मोहनि नख: न्ह्य:या समस्या

दैय् दसं थें थुगुसी नं मोहनि नख: व:गु दु । न्हापा लिपासिबें थुगुसीया मोहनि नख: भच्चा हनेगुलिङ पाइगु अवस्था दु । कारण देय्या राजनीतिक अवस्था । देशय् न्हूगु संविधान ला वल तर जनताया जनजीवन धइगु त:धंगु समस्या बलनाच्वंगु दु । मोहनि नख: हनीपिन्त भुतुलिङ मि च्याकेगु नितिं ग्याँस मदु । अले उखे थुखे नखत्या वनेगु नितिं नापं परिवार नापं वनेगु नितिं सवारी साधनया इन्धन मदु ।

सार्वजनिक सवारी साधन नं म्हो जक संचालन जुयाच्वंगु दु । उकिं थुगुसी मोहनि नख:या रैनक न्हापा लिपासिबें तसकं म्हो जुयाच्वंगु दु । कैयौ मनुतय्सं थुगुसी मोहनि नख:या भुवलय् पाहां ब्वनेगु नं मयायेगु अले मेपिन्त पाहां तकं मस:तेगु धका: तकं धयाच्वंगु दु । ग्याँस मदुगु अवस्थाय् थ:थाय् स:ता: नकेमा:सां खास हे छु नके फइगु अवस्था मदु अले मेपिन्थाय् वन धा:सां इमित नं ग्याँस मदुगु अवस्थाय् दु:ख जक बिइगु थें जा:गु ज्या जुइ ।

मोहनि नख: हनेगु अन्तिम इलय् तकं स्वनिगलय् थज्व:गु समस्या वयाच्वंगुया कारण धइगु तराईवासी अर्थात मधेसीतय्सं तराई लागाय् आन्दोलन यानाच्वंगुलिं ख: । इमिसं नेपा: भारतया नाकाय् च्वना लागतार रुपं आन्दोलन यानाच्वंगु दु । न्हापा थ:पिलिसे जूगु सहमति कार्यान्वयन यायेमा: धका: माग याना अथे आन्दोलन याना वयाच्वंगु दु । अले सरकारं नं आन्दोलनकारीया मागयात सम्बोधन याये माली धका: भारतं अधोषित नाकाबन्दी याना समस्या बलंगु धका: धायेगु नाप नापं मधेसवादीया आन्दोलनयात पूरा मयायेगु कथं राष्ट्रियताया नारा बिया भारत विरोधी माहोल दयेकेगु ज्या जक यानाच्वंगु दु । उकिं थथे हे सरकारया नीति जुल धा:सा स्वन्ति नख: तक नं समस्या अ:पुक समाधान जुइ धका: धायेफइगु अवस्था मदु ।

मुक्तक ज्ञानीराजया

जिगु खबि खना नं छ छाया न्हिला च्वना प्रिय
धा: जूगु छाति नं तुतीं छाया प्यंका च्वना प्रिय
जिगु चित्कार यात संगीत थें छाया लापा थाना
वनेगु सा हुं जिगु ग:प: छाया किया च्वना प्रिय ।



छंगु साथ मा:गु ई .. थ्व इलय् ला ख:नि
नापलायमा:गु ई .. थ्व इलय् ला ख: नि
ता: न्व:बले इतिमिति कना न्ह्य: वय् थाकु
पित्या चाय मा:गु ई : थ्व इलय् ला ख:नि ।

नेपालभाषाया रिभाइभिड यायेत्यल ला ?

-राजेन मानन्धर

नेपालभाषा गन थ्यनाच्वन, थ्व छगू बहसया विषय जुयाच्वंगु दु, नेवा:त, गैरनेवा:त, नेवा:भाय् ल्हाइपिं नेवा:त अले नेवा:भाय् मल्हाइपिं थ:त नेवा: धाइपिं दक्खिसिया दथुइ । गनं स्व:सा नेपालभाषा बांलाना वयाच्वंगु खनेदइ, गनं स्व:सा तनावनाच्वंगु खनेदइ-फरक दृष्टिकोणया खं । स्वइपिनिगु मिखा, क्यनीपिनिगु शीप दक्खं थ:थवय् जिम्मेदार दु । विदेशीतय्त क्यने मास्तिव:पिन्त भीगु बजारय् बांला:गु दृष्य नं दु, बांमला:गु दृष्य नं दु । सुयात छु क्यना: फाइदा जुइ व क्यनी ।

थज्या:गु हे थ:त क्यने मास्तिव:गु क्यने मालाच्वंगु दृष्य व सन्देश ज्वना: अमेरिकाय् च्वनाच्वपिं नेवा:तय्सं विश्वन्यंक नेपालय् नेवा: भाय्या अवस्था प्रचार यायेत धका: अंग्रेजीभासं छगू डकुमेन्ट्री दयेकूगु दु “रिभाइभिड नेपालभाषा” । छुं दिं न्ह्य:तिनि थुगु अंग्रेजी भाय्या डकुमेन्ट्री नेपालभाषा केन्द्रीय विभागय् क्यनेज्या जूगु ख: । थ्व क्यनेत हे बछि बछि जक नेवा: भाय् ल्हाइपिं थुकिया निर्मातात स्वयं अन उपस्थित जूगु नं ख: ।

जिं थूकथं रिभाइभिडया अर्थ नेवा:भाय्यात हानं “म्वाकेगु” वा पुनर्जीवन विइगु ख: । अथे धायेबलय् सामान्य अर्थय् थ्व नेपालय् नेपालभाषा धइगु मदयेधुंकल, मसानय् थुनातये धुंकल, आ: उकियात हानं अमृत जलं हाहा: याना: दक्षप्रजापतियात दुगुचिया छुंयं तया: म्वाकेथें म्वाकेमाल धइगु जुल ।

आ: न्ह्यस: वइ, छु भीगु भाय् अथे मदये धुंकल थ्यंक ख:ला ? सुयात नेपालभाषायात रिभाइभिड धायेगु अधिकार हे नं छाय् गनं दइ ? कित नेपालय् नेपालभाषा ल्हाइपिं सुं हे मन्त आ: हानं भुखाचं ल्हा:गु मरुसत: दयेकेथें जगानिसे दयेकेमाल, नु भी सकलें नेपालय् वना: दयेक: वनेगु धइगु सन्देश विइमा:गु अवस्था व:गु धइगु प्रमाणित जुइमाल । कित छिपिं नेपालय् च्वपिन्सं नेपालभाषा स्यानाछवत, जिमिसं म्वाक: वये धइगु योजना वयक:पिनिगु ल्हातिइ दयेमाल । मखु धइगु ख:सा गनं सुनां थज्या:गु शीर्षक तया: नेपालभाषाया आ:या अवस्थाया गलत मुल्यांकन अन्तराष्ट्रिय बजारय् क्यनेदइमखु । तसकं गंभीर खं ख: थ्व । थ्व हे स्वया: कन्हय् सुं विदेशीभाषा-पुरातत्वविद् नेपालय् नेपालभाषा मालेत म्याग्निफाइड ग्लास ज्वनावल धा:सा अथवा सुं भाषा(डाक्टर नेपालभाषाया सास: ल्यंकातयेत भेन्टिलेटर ज्वना:वल धा:सा व मनु अजू चाइगु अवश्यंभावी दु ।

केन्द्रिय तथ्यांक विभागया प्रतिशतया आधारय् भाय् तनावनाच्वन धाइपिन्सं म्वानावयाच्वंगु दृष्य छाय् मखनी ? नेपालभाषायात खतराया सुचीइ त:गु खनीगु तर थन नेवा:तय्सं नेपालभाषा ल्यंकेत छु छु यानाच्वंगु दु धइगु

मखनीगु गथे ? नेपालया सरकारी तथ्यांकया आधारय् खं ल्हायेत ला गोरखापत्र द हे दुनि अमेरिकाया स्वतन्त्र फसय् ब्वलिपिं, सत्यतथ्य मालीपिं थ:गु भाय्यात मतिना क्यनीपिं हे मा:ला ?

जिं व न्हय्दै बिका:दयेकूगु धा:गु डकुमेन्ट्रीइ प्यंग:थांया उल्लेख व छम्ह शिक्षिकां नेवा: भाय् ल्हाना: स्यनाच्वंगु बाहेक अज्या:गु रिभाइभिडया ज्या जुयाच्वन धइगु क्यनीगु छुं दृष्य, वर्णन वा जानकारी स्वयेमखन । नेपालय् नेवा: भाय् ल्हाइपिं मदु, थुकियात संरक्षण व विकास याइपिं थन सुं मदु धइगु हे सन्देश जक बियावन थ्व डकुमेन्ट्री । थन अनुमान या:थें २१औं शताब्दीइ ९० प्रतिशत नेवा:तय्सं भाय् हे त्व:तीगुसां आ:वइगु दःदौला भीगु ल्हातिइ दिन । अंग्रेजीभासं नेपालभाषा मन्त, मदयावन, ल्हाइपिं मदु अले जित: नेवा:, नेपाली, हिन्दी, अंग्रेजी भाय् ल्हायेव: धाधां डकुमेन्ट्री सिधइ । थुकथं थिथी हुनिं नेवा:तय्सं नेवा:भाय् ल्हायेगु त्व:तल, खय् भाय् व अंग्रेजी भाय् ल्हानाहल धइगु हे जक थुकिया सन्देश थें च्वन ।

अथे धायेबलय् नेपालभाषायात सरकारं सिखलं चिइयुंका: थ्यंमथ्यं सछि दीनसं नेवा:तय्सं थ:गु तंगु, स्यंगु मदुगु भाय्यात दयेकेत कुत: यानाच्वन व थ्व फिल्म दयेकूगु पुचलं मखंगु जुयाच्वन उकिं वयक:पिनिगु नितिं नेपालभाषाया पुनर्जीवनमाल लुमंकादिसं अज्या:गु अवस्थायाय् जेलनेल भोगेया:पिन्सं या:गु ज्यायाततकं भीसं पुनर्जीवन वा रिभाइभिड मधया, पुनर्जागरण जक धया) ।

अथे धायेबलय् गांगामय् खय्भाय् तकं मस:पिन्सं मांभाय् ल्हानाच्वंगु नेवा:भासं च्वयात:गु ढलंढः सफूत, पिदनाच्वंगु पत्रपत्रिकात, सांकिपात, म्येचा:त, नेपालभाषा केन्द्रीय विभागलगायत मांभासं ब्वंकीगु स्कुलत, इलय्ब्यलय् दबुलिङ दंवइगु प्याखंत, एफएम स्टेशन, टिभि स्टेशन, टिभिइ व एफएमय् व:गु ज्याभवत, वेबसमाचारपत्रत, वेबसाइटत, ब्लगत, नेवा:भाय् जक छयलीगु फेसबुक पेज व रूपत, थ:गु भाषिक अधिकारया लागि ल्हवंगु ल्हा:त छुं हे मखुत । ढलंढः भाषासेवीपिन्सं थ:गु मांभाय्या लागि विदेशय् वना: थ:गु जीवनया व्यक्तित्व, वृत्तिविकास व थ:गु जीवनशैली बांलाकेगु अत्याख अवसर त्व:ता: थ्व हे चा-लखय् पा:गु जीवनया मू मन्त । उमिसं या:गु ज्यायात सर कारं ला कदर मया: मया: नेवा: भाय्यात माया याना धा:पिंपाखें तकं न्याय मजुल । थ:गु छें च्या:गु हे ख:सां तापलय् च्वना: दुरविनं स्वया: “भचा मगा:”जक धायेगु लाकि ल: ज्वना: वयेगु ?

ख:, भीगु भाय् गनं गनं छुं हदतक न्हावनाच्वंगु दु, भाय् ल्हाइपिं म्हो जुयावनाच्वंगु दु । गनं राज्यया भाषा व शिक्षानीति अले गुम्हं गुम्हं अबु

मलिउ ब्वा:जु लिउ जुयाच्वंगु दु, भाय् ल्हाइपिं व भाय्यात मतिना याइपिं देसय् च्वने मछुया: तपा: लप्तेय् भवय् न:वंगु नं कारण मखइमखु । भीसं थ:गु भाय् ल्हाकेत यायेमा:गु ज्या बांलाक याये मफयाच्वंगु नं दु । थज्या:गु खंयात खाय् भासं आलोचना यायेमा: । थन थज्या:गु खंय् आलोचना जुयाच्वंगु नं दु अले उकियात सकारात्मक रुपं कया: ज्या याइपिन्सं न्हून्हूगु पला: न्ह्याकाच्वंगु नं दु ।

तर थन थ्व छु जूगु ? नां बांलाकेगु धायेगु तर स्यना वनाच्वन धका: जक क्यनेगु ? अथे अमेरिकाय् च्वना: स्वयेबलय् नेपालय् नेपालभाषा सिइयुंका: जक खनीगु ख:सा, थन वया: हनेबहपिं सत्यमोहनजोशीजु, चुन्दा वज्राचार्यजु, नरेशवीर शाक्यजु व सुरेश किरणजुलिसे अन्तरवार्ता कया: नं नेवा:तय्सं थ:गु मां भाय् म्वाकाच्वंगु दु धइगु खं थुइके मफुसा, अझ वयक:पिन्त नवाका: भीगु भाय् न्हा वनाच्वन धका: क्यनेगु ख:सा उकिं यानां नं “डाइड नेपालभाषा” (सिना वनाच्वंगु नेपालभाषा) धका: तयाबिउसा छु स्यनी ? अमेरिकां “डाइड नेपालभाषा” नांगु डकुमेन्ट्री दयेकी, व प्रमाणित जुल धा:सा जिमिसं थन नेपालं उकिया लिसलय् “रिभाइभिड नेपालभाषा” नांगु डकुमेन्ट्री दयेकेत कुत: याये ।

थन खं ल्हवनागु शीर्षक व सन्देशया जक ख: । नेपालय् संस्कृति न्हा वनाच्वंगु क्यन, अले अमेरिकाय् संस्कृति संरक्षणया ज्या अले विशेष याना: अमेरिकाय् च्वंगु छगू संस्थायागु ज्यायात जक छाया च्वछाया: क्यन धका: जिं कुलेगु आवश्यकता मतायेका । डकुमेन्ट्री हे मदयेकूसां नेपालय् च्वपिं नेवा:तय्सं विदेशय् च्वनाच्वपिं नेवा:तय्सं गन गथे छु ज्या यानाच्वन धइगु सामान्य जानकारी तयातयागु दु ।

थन नेवा:तय् पुचलय् छम्ह नेवालं नेपालभाषाया आन्दोलनयात कया: मगा:मचा:गु खं ल्हवनाक नकारात्मक जूगु आरोप बिइ, कप्तानचां कयेकल धाइ, चस्मा हिलेमाल धाईपिं दु । छथ्व: थन सुनां सुयातं आलोचना या:गु न्यने मय:पिं भजन जक हालाच्वं धाईपिं दु । तर उपिं अमेरिकाय् ब्वलिपिं अले नेपालभाषा आन्दोलनया दुग्यंगु अनुभव दुपिनिगु लिधंसा दुपिं नेवा:-अमेरिकातय्सं भीगु भाय्यात कया: नेपालय् ला नेपालभाषाया मृत्यु जुइयुंका, घ:सू भवय् न्यायेकेत्यल धका: अन्तराष्ट्रिय फिल्म फेस्टिभलय् गलत सुचं प्रवाहित यायेगु कुत:या:सां मुक दर्शक जुयाच्वनी । थज्या:बलय् नेपालय् अथे स्यन थथे स्यन दयेकेमाल धका: संसार य् बय्बय् याना: प्रोजेक्ट दयेकीपिं डोनेशन मुंकीपिं विदेशय् यक्व दु, जिमिसं मखनागु नं मखु । तर अथे यायेत जक गलत सन्देश विश्वय् बिइगु अधिकार सुयाकें दयेमजिउ ।

स्रोत: अनलाईन न्यूज

वातावरण संरक्षण समाजया स्वक्वःगु साधारण सभा



ज्वजलपा वा:पौ /

पाँगाया फोहर मैला व्यवस्थापन यायेत पलिस्था जूगु गैर नाफामुखी संस्था वातावरण संरक्षण समाजया स्वक्वःगु साधारण सभा वंगु असोज ३० गते शनिवा: पाँगाया चिखुइच्वंगु सेतो गुराँसया सभाहलय जुल ।

संस्थाया नायो शंकर डंगोलया नायोसुइ जूगु उगु सभाया उलेज्या सल्लाहकार समितिया नायो श्रीकृष्ण महर्जनं मैनावती च्याका यानादिल । संस्थाया न्वकू मेनूका महर्जनं लसकुस यानादिल ।

नायो शंकर डंगोलं संस्थाया वार्षिक प्रतिवेदन न्ह्यब्वया दिल । प्रतिवेदन कथं नेपाल सरकार शहरी विकास तथा भवन निर्माण विभाग वातावरण शाखां छगू नमूना समुदाय आधारित फोहर मैला व्यवस्थापन ज्याभवः पाँगाय् लागु यायेत पाँगा महिला बचत तथा ऋण

सहकारी संस्थाया ग्वाहालीं “वातावरण संरक्षण समाज” काठमाडौं जिल्ला प्रशासन ज्याकुथी दर्ता जुया ज्या याना वयाच्वंगु खः । थुगुसीनिसं समाज कल्याण परिषदय् नं आवद्ध जूगु दु ।

पाँगाय् मुंगु फोहर मैला मुंका: बली टहरा दयेका अरगानिक फोहर उत्पादन यायेगु ज्या नं यानावयाच्वंगु खँ कनादिल । उगु संस्थां असोज १ गते सामाजिक लेखाजोखा ज्याभवः नं याये धुंकल ।

आ: याकनं हे थुगु संस्थां ब्लुवेष्ट टु भ्यालु प्रा.लि.नाप सहकार्य याना थप लगानी याना बनीगु जूगु खँ नं कना: दिल । सुनां फोहर याई वहे धेवा पुलेमाली धैगु सोचयात व्यवहारय छयला छुं छुं धेवा कया: बांलाक फोहरमैला व्यवस्थापन यायेगु योजना दुगु खँ कनादिल ।

संस्थाया दांभरिं विना महर्जनं संस्थाया दच्छिया ल्या:चा: न्ह्यब्वया दिल । वय्कलं

वागमती सिथय् फोहर वांछवये मदयेवं नुवाकोटया सिसडोल थ्यंक फोहोर वांछवये यंके मा:गु, त:भुखाचं याना स्वला तक फोहर उठय् याना नं धेवा काये मखंगु । आ: नं दुज:त म्हो जूगुलिं थुगु दैय् रु.२३२९८७/ घाटा जूगु खँ कनादिल । संस्थायाके कूल स्थिर सम्पति थौंकन्हे रु.२८,०२,५३१/८७ दुगु खँ नं कनादिल ।

संस्थाया विधान कथं थुगुसी न्हूगु ज्यासना पुचः दयेके मा:गुलिं ज्यासना पुचःया ल्यज्या सर्वसम्मतिं जुल । गुरु थथे दु ।

अध्यक्ष: शंकर डंगोल, उपाध्यक्ष: मेनूका महर्जन, सचिव: चन्द्रमाया महर्जन, कोषाध्यक्ष: वीना महर्जन दुज:पिं नजरराम महर्जन, इन्द्रमान महर्जन, मनदेवी महर्जन, रजनी महर्जन, सुशीला महर्जन, सुमन महर्जन, मैया महर्जन दी ।

Lions Club of Kathmandu Golden Town या सेवा मूलक ज्याभवत



थ:गु थाय्या मतिना

Lions Club of Kathmandu Golden Towns या मू ज्याक् किपुली मखु । काठमाडौंया बत्तीसपुतली खः । तर व क्लवया नायो भाजु दिनेश दर्शनधारी किपूयाम्ह खः ।

किपूया दर्शन बचत तथा ऋण सहकारी संस्थाया अध्यक्ष जुया: मोविल्याण्ड गुप दयेका व्यापार व्यवसायलय् सफलम्ह छम्ह ल्यायम्ह खः दिनेश दर्शनधारी । लाइन्स क्लव अफ काठमाडौं गोल्डेन टाउनया अध्यक्ष वय्कलं क्लवं याइगु सामाजिक सेवा थ:गु थाय् किपुली यायेह:गु खः ।

वंगु असोज २२ गते किपूया ध:पाय् च्वंगु विश्व राष्ट्रिय माध्यमिक विद्यालयया सकल विद्यार्थीपनिगु मिखा

जाँचय् यायेगु ज्याभवः यानादिल । मिखाया समस्यादुपिं विद्यार्थीपिन्त नि:शुल्क वासः इनेगु नापं यक्व हे मिखा कमजोर जूपिं १२ म्ह विद्यार्थीपिन्त चस्मा नं नि:शुल्क इनाविल ।

थ्वहे क्लवं छुं ई न्ह्यः विश्व राष्ट्रिय माध्यमिक विद्यालयया पुस्तकालय बांलाक चलय् यायेत रु. छगू लख बराबरया सफू व पुस्तकालययात मा:गु भौतिक सामग्रीत नं प्रदान या:गु खः । उगु विद्यालयया हित व प्रगतीया निंतिं मेगु नं थीथी ज्या याना वनेगु सचिव सुवर्ण महर्जनं धयादिल ।

उगु क्लवं सामाजिक क्षेत्रय् याइगु ज्या किपू व किपूया ज:खः लागाय् याना वनेगु क्लवया नायो दिनेश दर्शनधारी कनादिल ।

मंगलमय हार्दिक शुभकामना



विजया दशमी एवं मोहनी नखः २०७२ को शुभ अवसरमा हाम्रा समस्त शेयरधनी सदस्य महानुभावहरु तथा शुभचिन्तकहरुमा मंगलमय हार्दिक शुभकामना

जय विष्णुदेवी बचत तथा ऋण सहकारी संस्था लि.

सुन्दरबजार, पाँगा कीर्तिपुर,

किपूया न्हापांगु पत्रिका लूनिभा:पाखें ल्हयया

४२ दँ न्ह्यः पिदंगु चिनाखँ

अर्ति

च्वमि :(जित लाल डंगोल
छयाञ्जे (बालकुमरी पुस्तकालय, पाँगा ।

जगते म्वाना च्वनागुया छु सार ?
धर्ति मांयात भार जक ज्वीक
“मां भाय्” या देगः चुत्तु च्वीक
नया, ल्वाना, दँ जक देना
“मां भाय्” थकाय्गु बिचाः मदुसा
जगते म्वाना ?

निम्ह, प्यम्ह मनू ल्यू ल्यू तया
“मां भाय्” थकाय्गु ध्वांग पुया
दाजु, किजापित हेजक हेका
कत भाय्या भ्यालि याना ज्वीगु सः
जगते म्वाना ... ?

ध्यवाया निंति कर्तव्य लोमंका
“मां भाय्” यात गा मोलं पुइका
सकसिनं नं सःस्यू धाय्का
कत भाय्या सफू पुत्तु पुइका ज्वीगु सा
जगते म्वाना?

तोति तोति स्वार्थी भावना
मुनेवा भी छथाय्
ल्हा बोय्का थौं तिंतिं न्ह्या
सकसिनं छकलं धाय् (“जय जय भी मां भाय्”

(चिनाखँय् बांलागु)

– ने. सं. १०९३ या मोहनिया लसताय् नेपालभाषाया साहित्यिक मुना पौ लूनिभा: किपूया न्हापांगु पौ ज्ञानवहादुर महर्जन सागा: नं पिथना दीगु खः । खुगु ल्या: तक पिदना: दीगु खः । पुलांगु साहित्य लुमंके कथं थन च्वसुत न्ह्यब्वया च्वना । न्हापा भीथाय् नेपालभाषां च्वइपिं यक्व दुगु खनेदु । आ: उलि खनेमदु । सायद थ:गु च्वसु पिथनेगु ह्वता: मदया जक ख:ला ? थ्वहे खँयात वा :चायेका ज्वजलपा वा:पौ नं साहित्य विधा: दुथ्याका यंकेगु आज्जु ज्वनागु जुल –संपादक

श्रीकृष्ण ज्यापु

स्वनिगा:या आदिवासीतय्सं मोहनि नख:यात थ:गु हे कथं हना वयाच्वंगु दु। नेवा: मखुपिं खय् व ब्रम्हुतय्सं हनीगु अले हिन्दूतय्सं हनीगु दर्शैसिबें ब्यागलं कथं मोहनि नख: नेवा:तय्सं हना वयाच्वंगु दु।

मोहनि नख: धइगु नेवा:तय्सं बुज्या नाप स्वाका अले वा लयेगु नितिं तयारी यायेगु कथंया नख:या रुपय् हना वयाच्वंगु दु। मनु हे छ: जुइगु कथंया दर्शन ज्वना नापं संघर्षवादी सिद्धान्तयात ज्वना नख: हना वयाच्वंगु दु। उकिं मोहनि नख:या महत्वया बारे चीहाकलं थन न्हयब्वयाच्वना।

मोहनि नख: अष्टमी:

अष्टमीयात नेवा:तय्सं कूछि भव्य धायेगु याना वयाच्वंगु दु। थ:पिनिगु जीवनय् मा:गु ल्वाभ: ज्याभ: तयारी अवस्थाय् दु ला मदु धका: स्वया: आ: न्हू अन्न वा दुकायेगु ई वइन धका: ल्वाभ: व ज्याभ: नापं थिथी ज्वलं धुकू क्वथाय् थापना याना व हे क्वथाय् च्वना: थ:गु कुलया फुक्क दुज:पिं भूवलकं च्वना भव्यनेगु याइ। कूलया भव्य जूगुलिं हे कूछि भव्य

नेवा:तय्सं मोहनि नख: गुगु कथं हनी ?



धा:गु ख:। अथे थापं याइगु इलय् छुं नं छ:या मूर्ति बाय् किपा: थापं याइगु मखु।

छगू कथं आ: छैय् अन्न गुलि दनि ? धका: अन्नयात नं तयेगु नापं ल्वाभ:या अवस्थायात थुइका न्हूगु वा दुकायेगु नितिं समान तयारी अवस्थाय् तया सहलह ब्याकेगु भव्य कथं नया वयाच्वंगु दु।

नेवा:तयगु मोहनि नख:या तसकं महत्वपूर्णगु दिं कथं कूछि भव्ययात नालात:गु दु। कूछि भव्यया अर्थ मथुया लिपांगु इलय् वया गुलिं गुलिसिं कूछि धइगु निमना निमना धका: तायेका निमना

निमना बजि दाना तकं नयेगु याना च्वंगु दु।

मोहनीया नवमी:

अष्टमी खुन्हु थापना यानागु सामानयात पूजा आजा यायेगु ज्या जुइ। मोहनि सिन्ह: फयेगु याइ। अले जीव वली विइगु याइ। नेवा: संस्कृति कथं पंचतत्त्वयात महत्व वियात:गु कथं जीव बलि बाय् खैय् बलि विइगु याइ।

तन्त्र साधन याना पुजा याइगु जुया हे जुइ सायद थुखुन्हुया हाकगु सिन्ह:यात मोहनि सिन्ह: धाइगु। तन्त्रनाप स्वापू दुगुलिं मोहनि सिन्ह: तीगु हे मोहनि नख:या विशेषता ख:। नव:मी खुन्हु जीव बलि विइ

धुंका: उखुन्हु हे बहनी बलि ब्यूम्ह जीवया सी इना विइगु याइ। कुलया फुक्कं च्वना थकार्लिनिसें सी इना विइगु याइ। गुलि गुलिसियां नव:मी खुन्हु हे नलास्वां छुइगु याइ।

मोहनीया दशमी:

नव:मी खुन्हु पुजाया:गुयात समापन यायेगु कथं पूजा याना न:लास्वां छुइगु याइ। दशमी खुन्हु मोहनी नख:या मेगु खास छुं नं याइमखु। मोहनि नख:या भूवलय् थ: म्थ्याय् मस्तयत् स:ता: जा नकेगु, भव्य नकेगु याइ। उकिया नितिं नं नख:यात स:ते हे मा:गु चलन दु। स:तेगु मयायेकं भव्य वनेगु याइमखु। अले मोहनि सिन्ह:

तिना मनु हे दिगिदिगि खाना पायो पिकायेगु तकं याइ। मनु हे छ: जुइगु कथं पायो पिकायेगु नाप नापं थ:पिनिगु जीवनय् प्रयोग जुइगु सामाननिसें बाजं तकं छयलेगु दिं कथं नं नालात:गु दु। उकिं दशमि खुन्हु हे बाजं थायेगु, प्याखं पिथनेगुनिसें सामान तकं छयलेगु याना वयाच्वंगु खने दु।

दार्शनिक पक्ष:

मोहनि नख:या दार्शनिक पक्ष धैगु छुं विशेष छ:याके वरदान कायेगु कथंया आदर्शवादी सिद्धान्त ज्वनाच्वंगु मदु। छुं नं छ:यात पुजा याइगु चलन मदु।



वरु थ:पिनिगु जीवनय् मा:गु सामनयात हे छ: भा:पिया आ: तयारी याना न्ह्या वनेगु संघर्षवादी सिद्धान्तयात नाला वयाच्वंगु दु। न्हूगु अन्न दुकायेगु अन्तिम ई वयाच्वंगुलिं आ न्हूगु दैया नितिं सकलें गुगु कथं मंका: जुया न्ह्या: वनेगु धका: सहलह ब्याकीगु छगू महत्वपूर्णगु नख:या रुपय् वयाच्वंगु खने दु। नेवा: संस्कृतिया दर्शन कथं संघर्षवादी सिद्धान्तयात नाला वयाच्वंगु दु मोहनि नख:या भूवलय्। उकिं मोहनि नख: व दर्शैया दथुइ दार्शनिक पक्ष पानाच्वंगु दु। दार्शनिक पक्ष पानाच्वंगुयात थुइका मोहनि नख: व दर्शै धैगु छगू हे मखु धका: थुइका थ:पिनिगु मौलिक पहिचानयात पिब्वयेगु कथं न्ह्या: वनेगु खैय् संस्कृतिविदतय्सं पित हया थुइका बिइमा:गु आवश्यकता दु।

मंगलमय हार्दिक शुभकामना



विजया दशमी एवं मोहनी नख: २०७२
को शुभ अवसरमा सम्पूर्ण देशवासीमा
सुख: शान्ति समृद्धिको लागि मंगलमय
हार्दिक शुभकामना

**Molung
HYDRO POWER**

Companu Pvt. Ltd

**Shree Ram Maharjan
Chairman**

PO Box: 10218, Rabibhawan, Kathmandu Nepal

Tel: 977- 1-4670518; Fax: 977-1-4670442

E-mail: mhp@wlink.com.np, molung.hydro@gmail.com

रामदेवी स्मृति प्रतिष्ठानया टहराया उलेज्या जुइगु

पाँगाया द:ने त:भुखाचं पिडीतपिनिगु नितिं रामदेवी स्मृति प्रतिष्ठानं दयेका त:गु २२ नीनिकु तहराया उलेज्या कन्हय् गैर आवासिय नेपाली संगठनया नाथो शेष घलें छगु ज्याभव्य:या दथुई उलीगु जूगु दु।

पाँगाया डा.देवकाजी डंगोल व विजय काजी डंगोलं पाँगाया देक्वय् थ:गु हे बुँई नीनिकु तहरा व हल छगू नं दयेका ब्यूगु दु।

मदये धुकूम्ह थ:पिनि मां रामदेवीया लुमन्ति रामदेवी स्मृति प्रतिष्ठान नांगु संस्था नीस्वना: वहे संस्थापाखें त:भुखाचं छें दुना: वया मेथाय् गनं छें दयेका च्वनेथाय् मनुपिं मनूतयगु निति उगु तहरा दयेका नि:शुल्क तयात:गु दु। छखल:सित निकू तहरा विया:



आ:यात भिगू परिवारयात तयात:गु दु।

कन्हय् कार्तिक २ गते सोमवा: वहे तहराया औपचारिक उलेज्या जुइगु संस्थाया नाथो ई.दुर्कमान महर्जनं ज्वजलपा वा:पौ यात कनादीगु दु। मूपाहाँ शेष घलेयात ध्वाकासीनिसें धिमे थाना: लसकुस याना यंकीगु जूगु दु।

डा.देवकाजी डंगोल कतारय् च्वनादीसां थ:गु मातृभूमि, मांभाय्, संस्कृतिप्रति वय्क:याके यक्व मतिना दु। वय्कलं पाँगाय् नेवा: सांस्कृतिक बाजा गाजाया संरक्षणया निति नं यक्व स्वाहालि यानाच्वनादीगु दु। वय्कलं थन निसें धिमे यंका: कतारय् नं न्हूद हनेगु व धिमे थाकेगु ज्या यानाच्वंगु दु।

मोहनि नख:या लसताय् भित्तुना

कीर्तिपुर सन्देश साप्ताहिक

ज्वजलपा वा:पौ



कीर्तिपुर सन्देश साप्ताहिक व ज्वजलपा वा:पौ परिवार

नेपालभाषाया उपन्यास

कीर्तिलक्ष्मी

—वासुपासा



भिन्छा

गोरखालि माहामित दहचौं व्वहां वयाव तिन थानां दानिगाल खुसि छिनाव त्यांगलाया माथुलिस थहां ववगु किपुमि मनुखं खंकाव धनवन्त काजिया साहलसं (नेतृत्वस) किपुया माहामित व अनया प्रजा मुंकाव दहच्च दौं व्वहांवया च्वंगु खनाव न्ह्याना वया च्वपिं गोरखाया खस माहामित अनसं दित ।

किपुमिया साहस खँनाव “आव छु यायेगु ?” धका आस मखँन, पृथ्वीनाराण शाहया ।

त्वाना काये धका वये धुंका लिहां वनेगुला ग्याफरा जुइगु खव धका कालु पाण्डे लिसल बिल । अयसा न्ह्याहांनु धका पृथ्वीनाराण शाह नं होकम बिइ ।

“होसया खंला” धका कालुपाण्डे न्ह्यावना गोरखाया खस माहामितयत न्ह्याव्वाकल । उखे नं “होसया !” धकाव किपुया माहामित न्ह्यव्वां वल । निखेरं न्ह्याना वया च्वपिं माहामित महाभार तथा हताल थें ख्वालं ख्वाल धो दुत । अन धनवन्त काजि न्ह्यवने वयाव “धर्म युद्धया तरिका सुचें बिया ल्वायेगु खव लाकि ? सुनानं मचायेक डाँका तयसं हयकाये थें यायेगु ? कावा ! न्ह्याहां वा धका पृथ्वीनारां शाहयात हाथ्या बिइ । पृथ्वीनारान शाहनं न्ह्यव्वइ । हताल न्ह्याइ ।

धनुषवाण खोन्दा नाप नापं गोरखाया खस तयसं तुपत नं मुइकिइ । उखें थुखें धनुखया वालाथु व्वइ । क तवकुलि, खतामगुलं नं किपुया मिसातयसं खस माहामिया कपालस क्वाइ । घनघोरं हताल जुयाच्वनिइ । उखेथुखें माहामित ग्वतुइ । अपालं गोरखाया खस तयसं प्राण तोल्टइ । अले सन्ध्याकालया इलस कालुपाण्डेयात किपुया माहामि खोन्दां गलपतस लाक्क पालाव गलपत चं दंका

बिइ । छैल मदुह कालुपाण्डे थवगु ल्हाहातस तलवार ज्वना निकु स्वकु व्वां वँनाव दामस लाना ग्वतुइ । वया छैल ज्वना छम्ह खस माहांमिं विसिउँ वनिइ । थव मुख्यम्ह माहांनायोया उगु गति खँनाव ल्यं दनिपिं माहामित नापं पृथ्वीनारां शाहनं विसिउँ वनिइ । अन थास छम्ह किपुया माहामि पृथ्वीनाराणयात ज्वँनाव पालेत खोन्दा ल्होनाव पाले त्यं वेलस मेवम्ह किपुया माहामि पालेत्यंगु ल्हाहा ज्वँना जुजुयात जुजुहे जक स्यायेमाव, भीसं स्याये पाले मजिउ, धर्म युद्धया अवखत जुइ” धका पृथ्वीनारां शाहया ज्यान मकासे तोल्ता छोइ ।

किपुमितसैं दहच्चस हयकाइ धका ग्यानाव चां चां नवक्वात विसिउँ वँना च्वनिइ । गुलि छिं गोरखाया खस माहांमित दहचोस तुं लिहां वँनाव कालुपाण्डेयागु छैल गोरखास तुं तयाव गोरखाया खस माहांमिं कालु पाण्डेयागु समाधि दयेका तइ ।

थुखे किपुमितयसं धनवन्त काजियात न्ह्यवने तयाव किपुमिया जय जुयेमा बाघ भैरवया जय जय ।” धयाव किपुदों गयाव किपुदे दुने दुहां वँनाव कालुपाण्डेया खुकुरी, वं न्ह्याना तवगु जंत्र व वं फिना तवगु नँ जालिया लं बाघ भैरवया देगलया तोनालस खायाव थवगु विजयया प्रतिकया रुपस व्वया तइ ।

जुजु ज्ञान प्रजां वीरम्ह महानायो व माहांमि व प्रजातयत मानतसे थव लायकुलिस यँकिइ ।



भिं निद्या

कालु पाण्डेयागु अर्ति बुखँयात हेल्ला यावगुलिं पृथ्वी नाराण शाहयात पछुताये चाये माल, उकिं सहयाये मफया नुगलस तवचोकं दित । उकिं यानाव वयात निरास तोपुया यंकल । मन थाते मलात । गुकिया कारणं याना पलख छ्थास च्वनै मफुत फेतुना कथं दँनेगु दँनाव हानं फेतुयेगु जुया च्वन । गुबेलें उखे गुबेलें थुखे च्वनिइगु । सुनापं खँल्हा बल्हा यायेगु बानि नं तँना वँन । आव किपुमि नाप हताल याये फइमखु धका सुमुक्क च्वन ।

थ्व अवस्था खँनाव वया किजा दल मर्दन, पृथ्वीपाल, वृन्द केशर, सूरप्रताप महादेव कीर्ति दलजीत व रणजित, रुद्रशाह फुक्क किजापिं मुँनाव ल्हाहापा ज्वरेयाना “थ्व मनयात थ थेतुं तय बिल कि जिपिं जक मखु सम्पूर्ण शाह वंश हे समाप्त जुइ । समाप्त हे जुइगुसा किपुमि नाप ल्वाना हे समाप्त जुये । तर समाप्त जुइगु जिमिसं मखना किपुमितय नाप आव जि हे ल्वाव

वँने, छिं छिगु मजस्थीतियात जक शान्त यानाव मन थासस तयादिसैं ।” धका विन्ति याइ ।

“छिपिं किपुमित नाप ल्वानाव सिइ, जिला ल्वाये मखुत इपिंनाप” धका पृथ्वीनाराण शाह च्वँना च्वंगु थासं जुरुक्क दँना वनिइ । अनंतुं वया किजापिं चमत्कारी योगि भगवन्त नाथया थास वँनाव अनेक भाव भक्तिं विन्ती यानाव थव दाजु पृथ्वीनार ण शाहया स्यंगु मनस्थितियात गथे यानाव थासस हयेगु ?” धका योगिया शरणस वनिइ । योगियात व्वनाहया पृथ्वीनाराण शाहया न्ह्यवने तइ । योगिं थव ल्हाहातस च्वंगु कमण्डलु बँस तया यवगु ल्हाहापा पुइकाव प्वंगु ल्हाहापा पृथ्वीनाराण शाहयात क्यँना ल्हाहा म्हुल चिनिइ ।

काली काली महाकाली

भद्रकाली कपालिनी

शक्तिकाली स्वेतकाली ।”

धका म्हुल चिना तवगु न्हाहा च्वस व्छया मिखा तिसिनाव मन्त्र व्वथें यानाव ल्हाहा म्हुल क्वस हया ल्हाहापा पर्यनिइ बेलस वहया अंगुलिस ह्याउँगु थिल थुना तवगु अंगुलि खँनेदइ । व चमत्कार खँनेवं पृथ्वीनाराण शाह भसंक्क वनिइ । वयागु मनस्थिती न्हापाया थास च्ववइ ।

अले व अंगुलि पृथ्वीनारान शाहयागु ल्हाहा ज्वँना न्ह्याकिइ । अले बँस च्वंगु कमण्डलुं लख कयाव जवपा ल्हाहातस तया पृथ्वीनाराण शाहयात इ इ पंक व्छाकिइ । अले “जि वँने धका वँने त्यबेलस सूर प्रतापशाह नं “जि छि थास वये” धका योगिया न्हायपनस विस्तारं धाइ ।

ख्वालसं च्वंगु लखयात ल्हाहात हुयाव “मखु मखु योगि बाबा दक्षिणा कया बिज्याहुं । धका पृथ्वीनाराण शाहनं धाइ ।

“योगिं काइमखु बिइ हं” धका योगि याकलचा लिहां वनिइ ।

थ्व चमत्कारी योगिं जितः चमत्कार याना बिल हानं छिमिसं थवपनि हिया परिचयनं जितः बिल । आव छिमिसं धाव थें जिं याये ।” धका पृथ्वीनाराण शाहनं किजापित धाल । जिमिसं धावथे मखु दाजुं धावथे याये ।” सूरप्रतापं नम्रभावं थव दाजुयात विन्ती यात । अले पृथ्वीनाराण शाहयागु ख्वाल स्वयाव फुक्क किजापिनि खिउँगु ख्वालनं न्हिउ ख्वाल जुया वल,



कथंहं.....

व्यवहारिक जीवन न्ह्याकेत मदयेकं मगाःगु शिक्षा

नासः (न्वचू उद्घोष व एफ एम संचालन कला)

उद्घोषण कला :—

उद्घोषण

उद्घोषण खँग्वः संस्कृतभासं वःगु खः । थः हे स्वतन्त्र अर्थ बिइ मफुगु तर मूल खँग्वलय न्ह्यःने स्वायेवं हे मूल खँग्वःयात विचलनय हयेगुनिसं खँग्वःयात अझ अप्वः स्पष्ट यायेगु ज्या नापं जोड बिइगु उपसर्ग याइगु खः । उकिं घोषणा मूल खँग्वः खःसा उकिया न्ह्यःसने उद उपसर्ग स्वायेवं उद्घोषण जूगु खः ।

थुगु अर्थय् उद उपसर्ग स्वायेवं अझ अप्वः वः बिइगु, स्पष्ट याःगु दु । उकिं छुं नं कथंया घोषणा यायेगु धइगु औपचारिक रुप खँ सार्वजनिक यायेगु वा कनेगु खःसा अले उकियात उप सर्ग न्ह्यःने स्वायेवं अप्वः वः विया नापं अप्वः काश यायेगु स्पष्ट नापं आकर्षक कथं घोषणा यायेगु

धइगु अर्थय् उद्घोष खँग्वः छ्यलातःगु दु ।

अझ अप्पुक् धायेबल दक्ले न्हापां छुं नं कथंया औपचारिक कथं जोड बिया धायेगु यात हे उद्घोषण धकाः मनूतय्सं थुइका वयाचवंगु दु । दक्ले न्हापां जोड बिया आकर्षक जुइगु खँ धायेगु यात हे उद्घोषण धकाः धायेफइ । उद्घोषण यायेगु ज्या धइगु न्वंवाना अर्थात सः पिकया, भाय् याना, च्वया नं याइ ।

अथे हे संगीतया माध्यमं नं उद्घोष याइ । थ्व हे थीथी माध्यमपाखें छुं नं खँ जानकारी बिइगु अले अप्वः जोड बिया आकर्षक याना वनेगु याना वयाचवंगु खने दु ।

उद्घोषणयात लिपांगु इलय् वया ज्याभ्वः न्ह्याकामि अर्थत संचालक धकाः नं धायेगु याना हःगु खने दु । उकिं आःया अवस्थाय् उद्घोषक वा संचालक

धइगु छगू हे अर्थ कथं थुइका वयाचवंगु दु । उकिं थ्व निगूयात छगू नाप मेगुया पर्यावाचीया रुपय् नं नालाहःगु दु । न्वंवाना छुं नं कथंया औपचारिक ज्याभ्वः या अनौपचारिक ज्याभ्वः जुल धाःसा मनूतयतगु दथुइ ज्याभ्वःया बारे जानकारी बिइगु कथं न्वंवाना उद्घोषण याइ ।

ज्याभ्वः सुरु जुसानिसें हे अन्तिम इलय् तक नं उद्घोषकं लगातार रुपं न्वंवाना जानकारी बिइगुनिसें ज्याभ्वःयात आकर्षक जुइकेगु भुमिका म्हिताच्वनी । उद्घोषण सामान्यतया न्वंवाना याइगु हे व्यवहारय् अप्वः प्रयोग जुयाचवंगु खने दु । भाय् याना सांकेतिक भाय् यात छ्यला नं खँ कनेगु ज्या जुइफु ।


उकियात भाय् याना उद्घोषण याःगु धाइ । सांकेतिक भासं कनेगु ज्या गबलें गबलें

जुइ । तापाक्क ताये मदुगु अवस्थाय् ल्हाः भाय् याना जानकारी बिइगु ज्या जुइ । अथे जानकारी बिइगु नं छगू कथंया सुचं बिइगु अले उद्घोषण यायेगु खः ।

उकिं भाय् याना नं उद्घोषण जुइ धकाः धायेफइ । च्वया छुं नं कथंया थःपनिगु माग बाय् सहमति व असहमति लगायतया विषययात चित्र च्वया वा लिपिं च्वया प्लेकार्ड ज्वना नं थःपनिगु खँ पित बिइफइ ।

ब्यानर व्वज्या याना नं थःपनिगु खँ पितबिइगु याना वयाचवंगु खने दु व्यवहारय् । व नं छगू कथंया उद्घोषण यायेगु खः ।

जुलस वा छुं नं कथंया प्रदर्शनय् तकं प्लेकार्डनिसें ब्यानर तकं ज्वना व्वज्या याना वनीगु धइगु नं मनूतयत जानकारी बिया वनीगु खः ।



संगीत इहिपाः जुइगु वाः

छुं नं बकथंया सांस्कृतिक जात्रा वा ज्याभ्वः जुल धाःसा बाजं थाना दक्ले न्ह्यःने च्वना वनी ।

छगू कथं थ्व नं उद्घोषण हे खः । मनू सित धाःसा बाय् जात्रा जुल धाःसां तापकनिसें ताये दयेक नाय्खिं बाजा थाना कहां बाजा पुया वनी । उकिं याना तापकनिसें ताये दइ ।

छुं हयाचवंगु दु धकाः व नं छगू कथं सांस्कृतिक उद्घोषण खः । थ्व परम्परा तसकं पुलांगु खःसा संस्कृतिया रुपय् नं नालातःगु दु । तर लिपांगु इलय् वया हाकनं जुलुस वा छुं नं कथंया ज्याभ्वलय दक्ले न्ह्यःने च्वना अथे बाजं थाना वनेगु याना वयाचवंगु दु ।

थ्व नं छगू कथं उद्घोषण याना वंगु खः । ल्वाकःबुकः उद्घोषण यायेगुलिइ नेवाः समाजय् नाय्खिं च्वयेकेगु धइगु



श्रीकृष्ण महर्जन

छगू कथंया ल्वाकःबुकः उद्घोषणया बालांगु उदाहरण खः ।

नाय्खिं च्वयेकेगु धइगु नाय्खिं बाजं थाना अर्थात संगीतया माध्यमं सकलसिगु ध्यानाकर्षण याइ अले भाय् यानानिसें अभिनय यायेगु अले न्वंवाना तकं घोषणा यायेगु वा जनाकरी बिइगु याइ ।

सापारुया इलय् ख्यालः क्यनेगुनिसें छुं नं कथंया जात्रा व नेवाः वस्तीया महत्वपूर्णगु सकलसिगु मंकाः विषययात कया जानकारी बिइमाल धाःसा नाय्खिं च्वयेकेगु याना वयाचवंगु दु ।

उकिं नाय्खिं च्वयेकेगु ज्या नेवाः समाजय् न्हापानिसें हे आकर्षक जुयाचवंगु उद्घोषण खः ।

कथंहं.....

किपूया भिनिदँया प्याखंया सफू पितव्वज्या

नेवा: पत्रकार राष्ट्रिय दबूया केन्द्रीय नाय:, नेपालमण्डल टेलिभिजनया समाचार प्रमुख नापं कीर्तिपुर सन्देश वा:पौया सम्पादक श्रीकृष्ण महर्जन च्यादीगु किपूया भिनिदँय पितनीगु गथु प्याखंया सफू वंगु न:लास्वने पारु खुन्हु छगू ज्याभव:या दथुइ मंका: कथं पितव्वज्या जूगु दु ।

किपूया गथु प्याखं नांगु उगु सफू गथु प्याखंया न्याम्ह गुरुपिन्सं मंका: कथं किपूया पीगं द्य:या न्हय:ने च्वना पितव्वज्या यानादीगु ख: । अथे पितव्वज्या यानादिसं गुरुपिं मध्ये राजकुमार माली किपूया गथु प्याखं किपूया गथुतयगु जक मखु फुक्क किपूमितयगु ख: धयादिसं किपूया म्हसीका नापं नेवा: म्हसीका पिब्वयाचंगु थुगु प्याखंयात सकलें जाना निरन्तरता विइमा: धयादीगु ख: । अथे हे च्वमि महर्जनं किपूया गथु प्याखं धइगु सप्तमातृका नापं भिन्छम्ह द्य:या प्याखं ख: धयादिसं थुगु प्याखं भिंयंगू सताब्दीनिसं न्ह्या:गु प्याखं ख: धका: धयादिल । गथु प्याखं वइगु मोहनि नख:या चालं खुन्हुनिसं ख्वा:पा: पुया पिकायेगु याइ । उगु प्याखंया बारे च्यात:गु सफू छगू कथं प्याखंया अभिलेखया रुपय् तयार यानागु ख: धका: नं च्वमि महर्जनं धयादिल ।



कृषक हित सहकारीया १५ औं साधारण सभा

ज्वजलपा वा:पौ /

किपूया दकलय् पुलांगु सहकारी संस्था कृषक हित सहकारी संस्था लि.या भिन्त्याक्व:गु १५ औं साधारण सभा असोज ३० गते सनिवा: कृष्ण क्याटरिंग हलय् क्वचाल ।

संस्थाया अध्यक्ष डा.कृष्णभक्त महर्जनया नायोसुइ जूगु उगु साधारण सभाय् संचालक जितेन्द्र महर्जनं लसकुस न्वचू वियादीगु ख: ।

संस्थाया संचालक समितिया दुज: राजकुमार नर्कर्मि संचालन यानादीगु उगु सभाय् अध्यक्ष डा.कृष्णभक्त महर्जनं वार्षिक प्रतिवेदन न्ह्यव्वयादिल । प्रतिवेदन कथं संस्थां आ.व.२०७१/०७२ य् खुद नाफा रु.५,९१,५७०/७३ कमाय यायेत ता:लागु न्ह्यथना त:गु दु ।

लेखा समिति संयोजक रविन्द्र बहादुर प्रधानं आर्थिक प्रतिवेदन न्ह्यव्वया दल । उगु प्रतिवेदन कथं पुँजी व दायित्व साधारण शेयर रु.४४,८६,२००/ थीथी कोषपाखे रु.३२,२५,८८१६/८७ मेगु दायित्वत रु.१६,०६,३१२/१७ याना मुक्कं रु.९३,१८,३९३/८४ दुगु खँ कनादिल ।

निगु प्रतिवेदन न्ह्यव्वय धुंका: प्रतिवेदनय् छलफल या:बलय् व्वति कयादीपिं यक्व दुज:पिन्सं प्रतिवेदनप्रति असन्तोष प्वंकादिल । खास याना: कृषक हित सहकारी धा:सां कृषक हितया छुं हे ज्या



मयागु, छँ बालं बिया वा: उठय् यायेगु बाहेक छुं हे ज्या मया:गु उकिं छुं छुं योजना दयेका ज्या याना वनेत इनाप यात । गुलिसं प्रतिवेदनय् संस्था गुवलय् पलिस्था जुल धइगु उल्लेख मजू धका: कुखिन । यक्व दुज:पिनिगु न्ह्यस: वसेलि बाघौतक सभा हे दिका: संचालकपिं थवथवय् सहलह याना: सकसितं चित्त बुझय् जुइक लिस: विसैलि मगा: मचा:गु छुं छुं तनेगु याना: वार्षिक प्रतिवेदन व आर्थिक प्रतिवेदन पास याना सभा क्वचायेकल ।

मोहनि नख: व चिकं अभाव हाइकु



ज्ञान ब. महर्जन 'नेवा:'

१.मोहनि वल
मचातय लिमला स्व:
बजा: वनेत ॥

२.थागा: मदु थौं
मोहनिया इलय् स्व
थ:थ:गु च्यूता ॥

३.मोहनि सिन्ह
त्यूजुइपिनी खँला
लिहे मला: स्व ॥

साहित्य/हाइकु

४.नुग: मछिका:
देया घा: लुमंका थौं
मोहनि हने ॥

५.मोहनि नख:
गुलिसियां अ:ख: रे
नुगल मछिं ॥

६.त: भुखाय् व्वया:
थागा:मदु नेपा: दे
लथालिङ्ग स्व ॥

७.लाचार मखु
थ:गु स्वाभिमान कयं
ल्हा: फया मखु ॥

हार्दिक श्रद्धाञ्जली

जन्म :
वि.सं. २००३



स्व.कृष्णमाया महर्जन

निधन :
वि.सं. २०७२/६/२०



यस संस्थाका संस्थापक शेयर सदस्य पाँगा शहिदपथ निवासी श्रीमती कृष्णमाया महर्जन (श्री बसन्त महर्जन र अशोक महर्जनका ममतामयी आमा) को यही असोज २० गते ६९ वर्षको उमेरमा असामयीक निधन भएकोले हामी मर्माहत भएका छौं । उहाँको निधन भएको आज १२ औं दिनको पुण्यतिथिमा दिवंगत आत्माको चिरशान्तिको कामना गर्दै हार्दिक श्रद्धाञ्जली अर्पण गर्दछौं ।

साथै यस दुःखद घडीमा शोकसन्तप्त परिवारजनले धैर्यधारण गर्न सकोस भनी हार्दिक समवेदना व्यक्त गर्दछौं ।

शंखापुर बहुउद्देश्यीय सहकारी संस्था लि.

शहिद पथ, पाँगा कीर्तिपुर-९, काठमाडौं, फोन नं. ४३३६२४४